

Uunga siunnersuut: Uranimik il. il., misissueqqaarnermut, ujaasinermit piiaanermullu inerteqquteqarneq pillugu Inatsisartut inatsisaat

(Ineqarnermut, Attaveqaasersuutitut, Aatsitassanut, Inatsisit Atuutsinneqarnerannut Naligiisitaanermullu Naalakkersuisoq)

Saqqummiussissut

(Ineqarnermut, Attaveqaasersuutitut, Aatsitassanut, Inatsisit Atuutsitsinneqarnerannut Naligiisitaanermullu Naalakkersuisoq)

Siullermeerineq

Naalakkersuisut sinnerlugit matumuuna uranimik il.il. misissueqqaarnermut, ujaasinermit piiaanermullu inerteqquteqarneq pillugu Inatsisartut inatsisaannut siunnersuut saqqummiuppara.

Siunnersuummi saqqummiunneqartumi uranimik misissueqqaarneq, ujaasineq piiaanerlu, kiisalu pisuussutit piiarniarneqartut agguaqatigiissillugu 100 ppm (parts per million) sinnerlugu uranimik akoqarpata, uranimit allaanerusunik misissueqqaarneq, ujaasineq piiaanerlu inerteqqutigineqarput.

Aammattaaq inerteqquteqarneq pinngoqqaatinut qinngornernik ulorianartunik akulinnut allanut atuutissasoq pillugu Naalakkersuisut maleruagassanik aalajangersaasinnaanerat, siunnersuut malillugu inatsimmi tunngavissinneqarpoq.

Naalakkersuisut aamma siunnersuut malillugu, inerteqquteqarnermut naapertuuttumik piiaaneq pisinnaasimangippat, akuersissutit aatsitassanut ikummatissanullu inatsit malillugu tunniunneqartut annikillissinnaavaat imaluunniit uterteqqusinnaallugit. Periarfissaq taamaattoq pinngoqqaatinut qinngornernik ulorianartunik akulinnut, inatsimmi tunngavissami aalajangersagaq siuliani taaneqartoq malillugu Naalakkersuisut inerteqqummik atuutsitsivigiligaannut, atuuppoq.

Kiisalu siunnersuut pineqaatissiisarnermut aalajangersakkanik imaqarpoq, taakkua malillugit inatsimmi inerteqquteqarnerup unioqqutinneqarnerani akiliisitsinermik pineqaatissiisoqarsinnaalluni, aammalu inatsimmi tunngavissami aalajangersagaq malillugu nalunaarutini pineqaatissiinermut aalajangersakkanik assingusunik aalajangersaasoqarsinnaalluni.

Siunnersuummi aalajangersakkat aatsitassanut ikummatissanullu inatsit malillugu akuersissutitut, inatsisip atuutilereernerata kingorna tunniunneqartunut, atuutissapput.

Naggataatigut inatsisissatut siunnersuut nassuiaatillu tassunga atasut innersuussutigissavakka.

Taamatut oqaaseqarlunga Naalakkersuisut sinnerlugit siunnersuut I Inatsisartuni suliassanngortippara.